

Privreda BiH može se pokrenuti

Privreda BiH može se pokrenuti, rekao je danas visoki predstavnik Valentin Inzko, ako nadležne vlasti na privredne reforme gledaju kao na prioritet.

Visoki predstavnik je održao govor prije no što je zvanično otvorio 20. međunarodni trgovinski sajam u Zenici.

„Bosna i Hercegovina će konkurentno učestvovati na svjetskom tržištu ako se poduzmu politički i administrativni koraci kojima će se većem broju kompanija omogućiti da počnu sa radom ovdje, i da rade na optimalan način, kako bi mogle otvoriti nova radna mjesta,“ rekao je visoki predstavnik.

Visoki predstavnik je kao svoju glavnu poruku istaknuo da su preduslovi za strana ulaganja i dobru ekonomiju stabilna politička situacija, te funkcioniranje pravne države i institucija. „Najnoviji je primjer, vrlo bitan za ekonomiju, federalna Komisija za vrijednosne papire. Ovoj agenciji, kao i svim ostalim, ključan je princip kontinuiteta. Nadam se da će vlasti prepoznati važnost kontinuiteta u ovoj komisiji i u tom smislu iznaći rješenje,“ rekao je Inzko.

„Druga poruka koja se mora poslati iz Zenice danas jeste da reforme mogu pokrenuti privredu BiH i da nadležne vlasti moraju na te reforme gledati kao na prioritet. Resursi su ovdje; talenti su ovdje; odlučnost i kreativnost i entuzijazam su ovdje – ono što nam treba je da se težište stavi na efikasne ekonomske reforme koje će napokon osloboditi neiskorišteni potencijal ove zemlje i njenih radnika i poduzetnika.“

Iako je izvoz u 2013. znatno porastao, nezaposlenost je također porasla. To je razvoj situacije koji je visoki predstavnik označio „neprihvatljivim“.

Cijeli tekst govora visokog predstavnika možete pročitati na [sljedećem linku](#).